



Broj/Broj: 1/4-50- 1-4-53/06  
Sarajevo/Sarajevo, 20.7.2006.

## **Z A P I S N I K**

### **53. sjednice Komisije za finansije i proračun Zastupničkoga doma Parlamentarne skupštine BiH,**

održane 20.7.2006., u vremenu od 10,00 do 11,15 sati

Sjednici su nazočili članovi Komisije: Ljiljana Milićević, Ruža Sopta, Beriz Belkić, Hazim Felić, Marija Perkanović i Mirsad Sipović.

Sjednici nisu nazočili: Fatima Leho (opravdano), Zlatko Lagumdžija i Dušanka Majkić.

Sjednici su nazočili i gosti: Zlatko Hurtić, predstavnik kabineta predsjedatelja Vijeća ministara BiH; Jasna Arsić iz OHR-a, Anđelka Dobrilović iz Istraživačkog odjela PSBiH; Dragica Hinić, tajnik Komisije.

Sjednicom je predsjedavala Ljiljana Milićević.

Za sjednicu je predložen sljedeći

### **DNEVNI RED**

1. Razmatranje Prijedloga zakona o izmjeni i dopuni Zakona o porezu na dodatu vrijednost, (predlagatelji: zastupnici Beriz Belkić, Senija Kapetanović, Azra Hadžiahmetović, Adem Huskić, Mehmed Suljkanović i Nijaz Duraković);
2. Razmatranje Prijedloga zakona o izmjeni i dopuni Zakona o porezu na dodatu vrijednost, (predlagatelj: zastupnik Nikola Špirić);
3. Razmatranje Prijedloga zakona o izmjenama Zakona o administrativnim pristojbama (predlagatelj: zastupnik Momčilo Novaković);
4. Razmatranje namjenske strukture:
  - a) Kapitalnih izdataka,
  - b) Programa posebnih namjena  
(sačinilac: Ministarstvo finansija i trezora BiH);
5. Tekuća pitanja:
  - a) Dopis Udruženja društava za lesing u BiH;
  - b) Obavještenje o sastanku predsjedateljice Komisije sa rezidentim predstavnikom MMF-a u BiH.

Na prijedlog Ljiljane Milićević članovi Komisije jednoglasno su odlučili da se razmatranje točke 4. odgodi za neku od narednih sjednica, s obzirom da nije bilo dovoljno vremena da se sa ovim obimnim materijalom upoznaju. Također jednoglasno je prihvaćen i prijedlog da se u okviru točke

5. dnevnog reda (koja sada postaje točka 4.) doda i podtočka c) u okviru koje bi se razmotrio dopis OSCE-a u svezi izrade izvješća o radu radnih tijela Parlamenta BiH.

**Ad. 1. Razmatranje Prijedloga zakona o izmjeni i dopuni Zakona o porezu na dodatu vrijednost (predlagatelji: zastupnici Beriz Belkić, Senija Kapetanović, Azra Hadžiahmetović, Adem Huskić, Mehmed Suljkanović i Nijaz Duraković)**

**Beriz Belkić**, u svojstvu predstavnika predlagatelja Prijedloga zakona o izmjeni i dopuni Zakona o PDV-u, dao je uvodno obrazloženje. Istaknuo je da je imao konstruktivne razgovore sa predsjedateljem UO UNO, Piterom Nicolom, u svezi predloženog zakona, te da je prihvatio sugestije predstavnika UO UNO, kojim će se pokušati iznaći način za njegovo prihvatanje u nekom narednom periodu. Također tokom ovih razgovora potvrđeno je da će UNO nastojati u što kraćem roku privrednim subjektima omogućiti povrat PDV-a. Stoga je predložio da Komisija usvoji **zaključak** kojim Komisija od Vijeća ministara BiH zahtjeva da u što kraćem roku uradi finansijsku analizu posljedica eventualne izmjene stope prihvatanjem navedenog prijedloga zakona, nakon čega će Komisija ponovo zatražiti mišljenje UO UIO o predloženom zakonu, i potom razmatrati i donijeti konačnu odluku. Ukoliko bi UO UNO nakon toga dao suglasnost za usvajanje ovog zakona, njegova primjena tekla bi od 1.1.2007.

U potom kraćoj raspravi učestvovao je **Mirsad Sipović**, koji je istaknuo da se u proceduri u zadnje vrijeme vrlo često i olako dostavljaju, bez dubljih analiza, prijedlozi izmjena Zakona o PDV-u. Suglasan je sa zaključkom koji je predložio g-din Belkić. Istaknuo je zatim da je on osobno u posljednje vrijeme izložen nizu neprincipijelnih pritisaka od strane vlastite stranke, čime su ugrožena njegova temeljna ljudska prava. O ovom problemu on će informirati i Parlament, OHR, kao i Vijeće Evrope.

Nakon okončane rasprave članovi Komisije jednoglasno su usvojili **zaključak** koji je predložio Beriz Belkić.

**Ad. 2. Razmatranje Prijedloga zakona o izmjeni i dopuni Zakona o porezu na dodatu vrijednost (predlagatelj: zastupnik Nikola Špirić)**

Kako je konstatirano da na sjednici nije nazočan predlagatelj prijedloga zakona o izmjeni i dopuni Zakona o porezu na dodatu vrijednost, Nikola Špirić, to su članovi Komisije jednoglasno odlučili da odgode raspravu o ovom prijedlogu zakona za narednu sjednicu, o čemu će predlagatelj biti obavješten. U slučaju da predlagatelj po pozivu ne nazoči i narednoj sjednici Komisije, smatrat će se da je odustao od Prijedloga zakona, sukladno članku 85.2. Poslovnika Zastupničkoga doma PS BiH.

**Ad. 3. Razmatranje Prijedloga zakona o izmjenama Zakona o administrativnim pristojbama (predlagatelj: zastupnik Momčilo Novaković)**

**Ljiljana Milićević**, u svojstvu ovlaštenog predstavnika predlagatelja Prijedloga zakona o izmjenama Zakona o izmjeni i dopuni Zakona o administrativnim pristojbama, ukratko je obrazložila razloge za njegovo upućivanje u parlamentarnu proceduru. Istaknula je da se temeljni razlog za donošenje ovog zakona nalazi u činjenici da je taksa za otpust iz državljanstva naše zemlje nesrazmjerno velika u odnosu na pristojbe u susjednim zemljama.

**Beriz Belkić** istaknuo je da s jedne strane stoji navedena argumentacija, ali s druge strane čin otpusta iz državljanstva jedne zemlje je jako važan korak i ne treba ga pri tome i država dodatno stimulirati. Stoga on neće podržati predloženi zakon.

**Mirsad Sipović** istaknuo je da će podržati Prijedlog zakona, jer je mišljenja da država ne može visokom taksom spriječiti osobe da traže otpust iz državljanstva, jer su oni svoju odluku već prethodno donijeli uslijed nemogućnosti da obezbijede egzistenciju u BiH-i. Ovo pitanje treba

rješavati putem zaključivanja sporazuma o dvojnomo državljanstvu, a ne putem politike visokih pristojbi.

Sa ovim mišljenjem suglasna je i **Ruža Sopta**.

**Marija Perkanović** također je mišljenja da ovaj prijedlog zakona ne predstavlja stimuliranje osoba za odlazak iz zemlje, a visoka pristojba nije ni način da se neko zadrži u zemlji. Treba voditi računa o standardu naših građana u svakom slučaju prilikom određivanja visine ovakvih pristojbi. Nakon okončane rasprave članovi Komisije usvojili su principe Prijedloga zakona s 5 glasova "za" i 1 glasom "protiv".

Kako je konstatirano da nije bilo uloženi amandmana, to je Prijedlog zakona usvojen u cjelini s 5 glasova "za" i 1 glasom "protiv", te upućen u dalju parlamentarnu proceduru.

#### **Ad.4. Tekuća pitanja:**

##### **a) Dopis Udruge društava za leasing u BiH**

**Ljiljana Milićević** informirala je nazočne da su u više navrata do sada dostavljani dopisi u svezi potrebe donošenja Zakona o finansijskom lizingu BiH. Tako je bio dopis Europske Federacije lizing kompanija, zatim dopis Doris Pak upućen g-dinu Miloradu Dodiku itd.

**Beriz Belkić** predložio da Komisija podrži i inicira donošenje navedenog zakona što prije.

**Ruža Sopta** istaknula je da lizing objektivno već egzistira i pored nepostojanja propisa i odgovarajućih institucija, te također podržala prijedlog za što žurnijim donošenjem predmetnog zakona na državnoj razini.

**Hazim Felić** također je dao punu podršku donošenju navedenog zakona.

**Ljiljana Milićević** potom je informirala da je Prijedlog zakona o finansijskom lizingu BiH već urađen, ali da već u dva navrata nije dobio podršku od strane Vijeća ministara BiH.

**Mirsad Sipović** naglasio je da je osobno već nekoliko puta sugerirao i predlagao donošenje navedenog zakona, jer će lizing jedino tako funkcionirati na pravi način. Potom je predložio zaključak kojim Komisija traži od Vijeća ministara BiH da u što kraćem roku dostavi Prijedlog zakona o finansijskom lizingu BiH u parlamentarnu proceduru.

**Marija Perkanović** potom je naglasila da trenutno nema političke suglasnosti za donošenje ovog zakona, te da bi Komisije jedino mogla inicirati vođenje dijaloga o ovom pitanju kako bi došlo do potrebnog konsenzusa na Vijeću ministara.

Po okončanoj raspravi članovi Komisije jednoglasno su usvojili **zaključak**:

„Komisija sugerira Vijeću ministara BiH da pokuša iznaći kompromis u cilju donošenja Zakona o finansijskom lizingu, te da je o tome informira u što kraćem roku.“

##### **b) Obavjest o sastanku predsjedateljice Komisije sa rezidentim predstavnikom MMF-a u BiH**

**Ljiljana Milićević** informirala je da je 11.7.2006. imala sastanak sa rezidentnim predstavnikom MMF-a u BiH i članovima osoblja. Na ovom sastanku razmjenjena su mišljenja o prijedlozima zakona o izmjenama i dopunama Zakona o PDV-u, kao i Prijedlogu zakona o izmjeni Zakona o izmirenju obveza temeljem računa stare devizne štednje, koji je Komisija usvojila na svojoj prethodnoj sjednici. Predstavnicima MMF-a ukazali su na izuzetne negativne finansijske efekte poslednje navedenog zakona na budžete u BiH, koji su isplanirani. Naglasila je da je tom prilikom informirala predstavnike MMF-a da se niko niti u jednom trenutku iz Vijeća ministara BiH nije zainteresirao za navedeni prijedlog zakona, niti je došao na sjednicu Komisije i pored urednog poziva.

**Mirsad Sipović** istaknuo je da je pobornik da se ljudima u što kraćem roku isplati ovo dugovanje, ali da se tom prilikom mora voditi računa i o javnom interesu, jer se ovim zakonom može dovesti u pitanje samo egzistiranje države, pogotovo što će država biti pored ove obveze opterećena i drugim obvezama, kao što je isplata po osnovi restitucije, sukcesije i dr.

**c) Dopis OSCE-a o jačanju rada zakonodavnih tijela.**

**Ljiljana Milićević** informirala je da je OSCE uputio jedno cirkularno pismo svim komisijama Parlamenta, kojim ističe potrebu za jačanje rada zakonodavne institucije u cjelini, kao i njenih radnih tijela. Ovim dopisom predloženo je da svaka komisija sačini izvješće o radu u mandatnom periodu, temeljem koga bi se izvršio lakši i bolji prijenos poslova na komisije u narednom mandatnom periodu.

Nakon kraće rasprave članovi Komisije jednoglasno su zauzeli stajalište da se za narednu sjednicu sačini predmetno izvješće o radu Komisije za mandatni period 2002.-2006.

Zapisnik sačinila

**Dragica Hinić**

Predsjedateljica Komisije

**Ljiljana Milićević**